

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

## **Consideratio status damnatorum, quod actiones ipsorum inprimis malas, concernit**

**Fecht, Johann**

**Durlaci, 1680**

III.

[urn:nbn:de:bsz:31-122744](https://nbn-resolving.org/urn:nbn:de:bsz:31-122744)



De  
*Statu Damnatorum,*  
*Quod actiones ipsorum malas concernit,*  
Disquisitio.



I. Difficilis est quæstio & inter Theologos Doctores non tam animorum contentione, quam argumentorum momenti agitata: quis & qualis damnatorum quondam in inferno status futurus sit, quod sive actiones eorundem sive passiones concernit? Et ut de passionibus, de quibus multorum luculentissima opera publicè extant, nunc nihil dicamus, an & quid acturi sint locorum infernalium cives? An damnati olim in inferno sint peccaturi, & quod præcipuè inquiritur, DEUM blasphematuri? Nam ab hac quæstione cœteræ ferè dependent.

II. Videas enim in sententiarum divortia abire, cum veteris Ecclesiæ Patres, tum recentioris ævi auctores. Non injucundum fore arbitror, si quosdam, ut institutum nostrum patietur, suomet ore loquentes audiamus.

III. Johannes Chrysoströmus, Novæ Romæ Episcopus, vir verè sui nominis, Homiliâ de Adorat. Cruc. Tom. I. Opp. Ed. Basil. p. 888. ubi infernalialia mala quasi in compendio enumerat, ita loquitur: *Liberabere tum & à gehennâ & à verme, qui venenum jacula-*

A

tur



tur & à stridore denium, & à vinculis, quæ dolorem afferunt, & ab angoribus, & à malis, & à tenebris lumine carentibus & à divissione & ab ignis fluminibus & ab execratione & à locis dolorum plenis. Cum hæc obscuriora sint, quam ut hinc indubitata aurei oris sententia hauriri queat, alium producemus locum. Commentario in Epist. Pauli ad Phil. Serm. III. Tom. IV. p. 1142. Non deploremus, inquit, simpliciter mortuos, sed eos, qui in peccatis sunt. Hi quippè & lamentis & planctu & lacrymis digni sunt. Nam dic, quaeso, quæ spes esse poterit illis, qui cum peccatis suis eò hinc abscedunt, ubi peccata exuere non licet? Donec enim erant in hoc seculo, plurimum forte erat expectationis & spei, immutandos illos, melioresque fore. Digressi verò in infernum, ubi nihil potest prodesse poenitentia, (in inferno siquidem, inquit, quis confitebitur tibi) quomodo digni non sunt, qui deplorentur? Quæ iisdem ferè verbis repetita leges, Homiliâ LXIX. ad populum Antiochenum, cujus argumentum est, quod peccatores lugendi sint viventes & mortui; Tom. V. p. 438. In enarratione Historiæ de Epulone divite & Lazaro, Tom. II. p. 1320. f. hypocritin epuloni attribuit; hoc enim dicente: Pater Abraham, miserere mei; notat: Frustra agis poenitentiam in loco, ubi non est poenitentia locus. Tormenta te cogunt agere poenitentiam, non mentis affectus. Et mendacium; nam ad verba epulonis: Rogo ergo te pater, ut mittas eum in domum patris mei, subdit: vide per versitatem, nec in ipsis poenitentia continet veritatem. Vides enim, quid dicat? Rogo ergo te pater? Ergo Pater est Abraham. Et quomodo ergo dicis, mitte eum in domum patris mei? non oblitus es patris tui? non es oblitus, quia pater ille te perdidit? Hæc ille.

IV. Patrum Augustissimus, Augustinus, cui omnium eruditorum iudicio conceditur palma, in Enchiridio ad Laurentium, cap. CXI. his verbis promittit sententiam suam: Post resurrectionem verò factò universo, impletoque iudicio, suos fines habebunt civitates duæ, una Christi, altera diaboli, una bonorum, altera malorum, utraque tamen angelorum & hominum. Istis voluntas, illis facultas non poterit ulla esse peccandi, vel ulla conditio moriendi: istis in eternâ vitâ verè feliciterque viventibus, illis infeliciter in eternâ morte sine moriendi potestate durantibus, quoniam utriusque sine fine. Sed in beatitudine isti, alius alio, prestabilis, in miseriam verò illi alius alio tolerabilis permanebunt. Crucem fixerunt interpretibus illa Doctoris verba: **ILLIS FACULTAS NON POTERIT ULLA ESSE PECCANDI.** Lambertus Danæus, di-